



REPUBLIKA E KOSOVËS/REPUBLIKA KOSOVA

GJYKATA THEMELORE GJAKOVË - DEGA E GJYKATËS RAHOVEC

Numri i lëndës: 2023:133362

Datë: 19.03.2024

Numri i dokumentit: 05469644

C.nr. 539/2023

GJYKATA THEMELORE GJAKOVË – DEGA NË RAHOVEC, Departamenti i Përgjithshëm, Divizioni Civil, gjyqtari Berkan Hamza, me bashkëpunëtoreshen profesionale Adelina Çmega, duke vendosur në çështjen juridike kontestimore të paditësve S.K nga fshati Xërxë, Komuna e Rahovecit dhe L.K nga fshati Bellacërkë, Komuna e Rahovecit, të cilët sipas autorizimit i përfaqëson avokati D.M nga Prizreni, kundër të paditurës Komuna e Rahovecit – Drejtoria Komunale e Arsimit, të cilën sipas autorizimit e përfaqëson avokati B.O nga Rahoveci, me bazë juridike kompensimi i ushqimit në punë, vlera e objektit të kontestit 1,474.00 euro, jashtë seancës, më datën 19.03.2024, mori këtë:

A K T G J Y K I M

APROVOHET PJESËRISHT SI E BAZUAR kërkesëpadia e paditësve: S.K dhe L.K.

DETYROHET e paditura Komuna e Rahovecit - Drejtoria Komunale e Arsimit, që paditësit S.K, nga fshati Xërxë, Komuna e Rahovecit, në emër të kompensimit për ushqim në punë për periudhën kohore prej datës 18.04.2021 e deri më datën 21.11.2022 për 363 ditë pune të ja paguajë shumën prej 726.00 euro duke e llogaritur nga 2 euro për çdo ditë të prezencës në punë, me kamatë ligjore 8% nga data 13.06.2023 (data e parashtrimit të padisë) e deri në pagesën definitive, të gjitha këto në afat prej 7 ditësh nga dita e pranimit të këtij aktgjykimi, me pasojat ligjore të përmbarimit të detyrueshëm.

DETYROHET e paditura Komuna e Rahovecit - Drejtoria Komunale e Arsimit, që paditësit L.K nga fshati Bellacërkë, Komuna e Rahovecit, në emër të kompensimit për ushqim në punë për periudhën kohore prej datës 21.01.2021 e deri më datën 21.11.2022 për 267 ditë pune të ja paguajë shumën prej 534.00 euro duke e llogaritur nga 2 euro për çdo ditë të prezencës në punë, me kamatë ligjore 8% nga data 13.06.2023 (data e parashtrimit të padisë) e deri në pagesën definitive, të gjitha këto në afat prej 7 ditësh nga dita e pranimit të këtij aktgjykimi, me pasojat ligjore të përmbarimit të detyrueshëm.

HEDHET POSHTË si e palejueshme padia e paditësve S.K dhe L.K, në emër të kompensimit për ushqim në punë për periudhën kohore prej datës 21.01.2021 e deri më datën 17.04.2021 për 54 ditë pune, për shkak të çështjes së gjykuar - res iudicata.

DETYROHET e paditura Komuna e Rahovecit – Drejtoria Komunale e Arsimit, që në emër të shpenzimeve të procedurës, paditësve S.K dhe L.K, t'i paguajë shumën prej 187.00 euro, në afat

prej 7 ditësh nga dita e pranimit të këtij aktgjykimi, me pasojat ligjore të përmbarimit të detyrueshëm.

### A r s y e t i m

Paditësit S.K dhe L.K, më datën 13.06.2023, në këtë gjykatë ndaj të paditurës Komuna e Rahovecit – Drejtoria Komunale e Arsimit, kanë parashtruar padinë për kompensimin e ushqimit në punë në shumën prej 1,474.00 euro.

Të njëjtit sipas padisë kanë theksuar se janë në marrëdhënie pune si mësimdhënës në SHMFU “Hamëz Thaqi”, në fshatin Xërxë, Komuna e Rahovecit, ku edhe janë duke punuar në këtë institucion, e që duke llogaritur për periudhën kohore nga data 21.01.2021 deri më 21.11.2022, paditësve i takon e drejta e kompensimit të ushqimit në punë, për një ditë pune, shuma prej 2 euro, por që deri më tani nuk janë kompensuar. Në bazë të lartcekurave dhe duke u bazuar në dispozitat e Ligjit të punës përkatësisht nenit 35 par.7 të Kontratës Kolektive të Arsimit në Kosovë të datës 21.01.2021, e cila përcakton kompensim për ushqim gjatë punës. Andaj, i kanë propozuar gjykatës që padinë dhe kërkesëpadinë ta aprovojë në tërësi si të bazuar.

Shpenzimet e procedurës i ka kërkuar.

E paditura Komuna e Rahovecit – Drejtoria Komunale e Arsimit, në përgjigjen e saj në padi të datës 25.10.2023, ka theksuar se e kontestojmë padinë në tërësi padia e paditësve nuk ka bazë të qëndrueshme ligjore. Duke shtuar se paditësi S.K me aktgjykimin C.nr.612/2021, i datës 24.07.2023 ka realizuar kompensimin e ushqimit për periudhën prej 01.01.2021 – 17.04.202, ndërsa paditësi L.K me aktgjykimin C.nr.616/2021, i datës 19.04.2023, ka realizuar kompensimin e ushqimit për periudhën kohore prej 01.01.2020 – 17.04.2021. Po ashtu më 21.11.2022 MASHT-i ka shkëputur Kontratën Kolektive të Arsimit të datës 21.01.2021 të lidhur me SBASHK. Në bazë të shkresave të lëndës shihet se paditësi nuk ka parashtruar ndonjë ankesë kërkesë për kompensim pranë të paditurës. Gjykata mund të shqyrtoj një padi që ka elemente nga kontesti i marrëdhënies së punës vetëm nëse paditësit i kanë shtjerrur të gjitha mjetet në procedurë të rregullt pranë të paditurës si punëdhënës, dhe atë konform Ligjit të Punës. Duke shtuar se kërkesa në kuptim të nenit 87 të Ligjit të Punës, është parashkruar. Andaj i ka propozuar gjykatës që kërkesëpadinë e paditësit ta refuzoj tërësisht si të pa bazuar ndaj të paditurës Komuna Rahovecit.

Shpenzimet e procedurës i ka kërkuar.

Për të vërtetuar gjendjen faktike në mënyrë të plotë dhe të drejtë, gjykata ka bërë administrimin e këtyre provave: vërtetimit mbi ditët e prezencës në punë me Nr. 44/2, i datës 04.04.2023, i lëshuar nga SHFMU “Hamëz Thaqi” në fshatin Xërxë; kontratën e punës për mësimdhënës me Nr. të protokollit 650/16, e datës 06.09.2016, e lidhur ndërmjet Komunës së Rahovecit – Drejtoria Komunale e Arsimit dhe paditësit S.K; vërtetimit mbi ditët e prezencës në punë me Nr. 44/3, i datës 04.04.2023, i lëshuar nga SHFMU “Hamëz Thaqi” në fshatin Xërxë dhe kontratën e punës për mësimdhënës me Nr. të protokollit 531/15, e datës 10.09.2015, e lidhur ndërmjet Komunës së Rahovecit – Drejtoria Komunale e Arsimit dhe paditësit L.K.

Gjykata pasi që bëri vlerësimin e secilës provë veç e veç dhe të gjitha së bashku, mbështetur në dispozitat nga neni 8 dhe 398 të LPK-së, arriti në përfundim se në këtë çështje juridiko-civile duhet vendosur si në dispozitiv të këtij aktgjykimi, pasi që:

Nuk ishte kontestues fakti se paditësit kanë të themeluar marrëdhënien e punës tek e paditura. Po ashtu nuk është kontestues as fakti se paditësit për periudhën e kërkuar kohore kanë prezantuar në punë. Në këtë çështje juridike kontestues mbetet fakti se a i takon paditësve pagesa e ushqimit për çdo ditë të prezencës në punë, dhe a është parashkruar e drejta për të kërkuar kompensimin e ushqimit.

Me administrimin e vërtetimit mbi ditët e prezencës në punë me Nr. 44/2 i datës 04.04.2023, gjykata vërtetoi faktin se paditësi S.K, në periudhën kohore prej datës 21.01.2021 e deri më datën 21.11.2022 ka prezantuar në punë në 417 ditët e punës.

Me administrimin e kontratës e punës për mësimdhënës Nr. të protokollit 650/16, e datës 06.09.2016, të lidhur ndërmjet paditësit S.K dhe të paditurës, gjykata vërtetoi faktin se paditësi ka kontratë pune me të paditurën dhe i njëjti është i sistemuar në vendin dhe me detyrat e punës në SHFMU “Hamëz Thaqi” në fshatin Xërxë, Komuna e Rahovecit.

Me administrimin e vërtetimit mbi ditët e prezencës në punë me Nr. 44/3 i datës 04.04.2023, gjykata vërtetoi faktin se paditësi L.K, në periudhën kohore prej datës 21.01.2021 e deri më datën 21.11.2022 ka prezantuar në punë në 321 ditët e punës.

Me administrimin e kontratës e punës për mësimdhënës Nr. të protokollit 531/15, e datës 10.09.2015, të lidhur ndërmjet paditësit L.K dhe të paditurës, gjykata vërtetoi faktin se paditësi ka kontratë pune me të paditurën dhe i njëjti është i sistemuar në vendin dhe me detyrat e punës në SHFMU “Hamëz Thaqi” në fshatin Xërxë, Komuna e Rahovecit.

Gjykata ka vendosur ta aprovojë pjesën e kërkesëpadisë të paditësve për faktin se paditësit në periudhën kohore nga data 18.04.2021 e deri më datën 21.11.2022 në vendin e tyre të punës kanë prezantuar dhe atë paditësi S.K ka prezantuar në 363 ditët e punës, ndërsa paditësi L.K ka prezantuar në 267 ditët e punës. Kjo është vërtetuar sipas vërtetimeve të lëshuara nga vetë shkolla ku paditësit kanë qenë duke punuar, ndërsa vërtetësinë e këtij dokumenti nuk e ka kontestuar as e paditura, si dhe duke zbritur ditët e punës nga ky vërtetim dhe atë 54 ditë pune, për periudhën kohore nga data 01.01.2021 e deri me datën 17.04.2021, pasi që për këtë periudhë janë kompensuar më parë. Baza juridike e kërkesëpadisë buron në nenin 90 par.5 të Ligjit të Punës, ku parashihet se “*Marrëveshja Kolektive vlen për ata punëdhënës dhe punëmarrës të cilët marrin përsipër detyrimet e përcaktuara me Marrëveshjen e tillë Kolektive*”. Ndërsa sipas nenit 35 par.7 të Kontratës Kolektive të Arsimit në Kosovë e datës 18.04.2017 si dhe Kontratës Kolektive të Arsimit në Kosovë e datës 22.01.2021 parashihet që “*Të punësuarve, u sigurohet kompensimi për ushqim gjatë punës për ditët e pranisë në punë. Vlera e kompensimit të shpenzimit të ushqimit në punë për një ditë pune është 2 (dy) euro për të punësuarit që kanë marrëdhënie e punës primare në institucionet arsimore*”. Në rast se shumëzohen 363 ditët e prezencës në punë me nga 2 euro të paditësit S.K, për secilën ditë të prezencës në punë, do të kemi shumë të përgjithshme prej 726 euro, dhe në rast se shumëzohen 267 ditët e prezencës në punë me nga 2

euro të paditësit L.K, për secilën ditë të prezencës në punë, do të kemi shumën e përgjithshme prej 108 euro.

Sa i përket çështjes së parashkrimit, gjykata vlerëson se në rastin konkret nuk kemi të bëjmë me parashkrim të kërkesës për faktin se padia e paditësve është dorëzuar më datën 13.06.2023, ndërsa kërkesëpadia e paditësit përfshin periudhën kohore prej datës 21.01.2021 e deri më datën 21.11.2022.

Gjykata me rastin e vendosjes, jashtë seancës gjyqësore, është bazuar në dispozitën e nenit 398 të LPK-së, e cila dispozitë përcakton se *“Kur gjykata, pasi t’i arrijë përgjigja në padi, konstaton se ndërmjet palëve nuk është kontestuese gjendja faktike, dhe se nuk ekzistojnë pengesa të tjera për dhënien e vendimit meritor, atëherë ajo, pa caktuar fare seancë gjyqësore, mund ta jep aktgjykimin me të cilën e pranon si të themeltë kërkesëpadinë”*.

Gjykata ka vendosur që ta hedhë poshtë si të palejueshme pjesën tjetër të kërkesëpadiës të paditësve S.K dhe L.K, në emër të kompensimit për ushqim në punë për periudhën kohore prej datës 21.01.2021 e deri më datën 17.04.2021 për 54 ditë pune, për faktin se paditësi S.K për kompensimin e ushqimit në punë është kompensuar me aktgjykimin C.nr.612/2021, i datës 24.07.2023 në shumën prej 108.00 euro. Ndaj këtij aktgjykimi pala e paditur nuk ka ushtruar ankesë, i njëjti ka marr formën e prerë. Po ashtu edhe paditësi L.K për kompensimin e ushqimit në punë është kompensuar me aktgjykimin C.nr.616/2021, i datës 19.04.2022 në shumën prej 165.00 euro, shuma e cila përfshin edhe periudhën e kërkuar nga paditësi në kërkesëpadinë nga data 21.01.2021 deri me datën 17.04.2021. Ndaj këtij aktgjykimi pala e paditur kishte ushtruar ankesë, ndërsa Gjykata e Apelit me Aktgjykimin me numër Ac.nr.3917/2022 të datës 25.09.2023 e ka vërtetuar aktgjykimin e shkallës së parë. Kjo gjykatë këtë padi e ka hedhur si të palejueshme duke u bazuar në nenin 391 pika d) të LPK-së sipas të cilit parashihet që *“Pas shqyrtimit paraprak të padisë gjykata me aktvendim e hedh poshtë padinë si të palejueshme po që se konstaton se: d) çështja është gjë e gjykuar (res iudicata)”*.

Vendimin lidhur me kamatën në lartësi prej 8%, gjykata e mori në kuptim të nenit 382 të LMD-së, duke llogaritur nga dita e paraqitjes së padisë.

Nga të lartcekurat, duke u mbështetur në dispozitat e nenit 90 par.5 të Ligjit të Punës, nenit 2 par.1 pika 1.2 dhe neni 35 par.5 dhe par.7 të Kontratës Kolektive të Arsimit në Kosovë e datës 18.04.2017 si dhe Kontratës Kolektive të Arsimit në Kosovë e datës 22.01.2021, nenit 398 të LPK, gjykata vendosi si në dispozitiv të këtij aktgjykimi.

Vendimin mbi shpenzimet procedurale gjykata e mori në kuptim të nenit 449 dhe 452 të LPK-së.

GJYKATA THEMELORE GJAKOVË – DEGA NË RAHOVEC  
Departamenti i Përgjithshëm – Divizionin Civil  
C.nr.539/2023, më datën 19.03.2024

Bashkëpunëtorja profesionale  
Adelina Çmega

Gjyqtari  
Berkan Hamza

**KESHILLË JURIDIKE:** Kundër këtij aktgjykimi, pala e pakënaqur ka të drejtë ankese në afatin prej 7 ditëve pas ditës së pranimit të të njëjtit, Gjykatës së Apelit në Prishtinë, e nëpërmjet të kësaj gjykate.